

No. 138. 1459. 1. Apr.

*Letztwillige Verfügung der Dorothea Sengerin.*

Dorothea Sengerynne hat zcu eynem selewarten gesatzt vnde gekorn hern Michel Dommes in kenwertikeit ern Balthasars Marcgraffen yres beichtvaters, Andres Hennyg, Paul Kippenhayn schepphen, Johannis Settlers des statschrybers vnde Hans Friderichs anno domini .c. LIX<sup>o</sup> prima die mensis Aprilis vnd hot aldo beschiden als hirnach geschriben. Item zcum ersten hot sy bescheyden ern Andres zcu Struppen eyn virtel byr. Item der kirchen zcu Stroppen eyn halb fuder byr. Item er Michel Dommes ii halbe fuder byr. Item der grune mantel gehoret zcu der gerade. Item den brudern in das closter ii halbe fuder byr. Item der pharrekirchen ʒ fuder byr. Item sente Niclas ʒ fuder byr. Item ern Baltasar yrm beichtvater xii gr. vnde eyn lylach zcu eym korrocke. Item der bruderschaft Vnßer liben frauwen eyn halb fuder byr. Item ʒ fuder byr zcu eym kelch in das spittel. Item yren bellitcz der Wassermanynn, dy yr hat gewart. Item yren besten sleyer den monchen. Item eynen ballen leymwat sal man keuffen zcu hemden armen schulern. Item man sal yr das drysigste halden. Item eyn selebat. Item was yr zcu yrem dritteyl geboren wurde von yrem huße, sal man versuchen, ab man dovon gestiffen moge armen luthen alle iare eyn tuch zcu sneyden, were das nicht, so sal man doch eyne summe geldis zcinß stiffen, das man armen luthen schw dovor alle iore kouffen moge, sunder yr son, ob der noch lebete, sal syn zwey teil uff dem huße haben, were er aber von todis wegen abe gegangen, so sal man sulch geldt ouch zcu selegerethe wenden noch derkentniß des rathis vnde yres selewarten.

Nach dem Schöffenbuch I fol. 151<sup>b</sup> im Archiv des K. Bezirksgerichts zu Pirna.

No. 139. 1459. 22. Juli.

*König Georg von Böhmen bekennt, für den Verzicht auf die prätendirten Rechtsansprüche der Krone Böhmen auf Schloss und Stadt Pirna von Kurfürst Friedrich II. die Summe von 20000 rhein. Gulden erhalten zu haben.*

Wir Jorg von gots gnaden kunig zu Behem, margraff zu Merhern, herczog zu Luczburg vnd Slesii vnd margraff zu Lusicz bekennen vor vns vnser erben nachkomen kunige vnd vnser crone zu Behem mit disem briue, als der hochgeborne furst herr Friderich herczog zu Sachsen, des heiligen Römischen reichs erczmarschalk vnd kurfurst, lanntgraue in Doringen vnd margraue zcu Missen vnser lieber sweher zwenczig tūsent guter reinischer gulden guter am golde vnd swer gnug am gewichte guter lanndeßwerung vor die gerechtikeit, die wir als ein kunig zcu Behem von vnser vnd der cron wegen zu Behem an dem sloß vnd stat Pirne im lannde zcu Missen an der Elbe gelegen mit iren zugehorungen meynten zcuhaben vnd vns vnd der cron zcu Behem vor die obengnannt summa goldes recht vnd redlichen abgekauft hat, schuldig gewest ist, als das sein schuldbrieff vnns darüber gegeben besagt, daz vns vnnsrer lieber sweher herczog Fridrich obgerurt sulch summa geldes wie obengemelt ist wolczudancke vnd gutlich bezalt hat, vnd sagen hirmit seine libe, seine erben vnd erbnemen vnd nachkomen der gemelten summa zwenczig tūsent gulden, die wir empfangen, an vnsern vnd der cron nucz vnd fromen gewannt haben, fur vns, vnser